


TEZAU LITURGIC

30 IULIE

**ACATISTUL
SF. CUVIOASE
ANGHELINA
BRANCOVICI
A SERBIEI
II**



MOSCOVA, 2000



Акафист

святой блаженной

Ангелине Сербской

Кондак 1

Избранней дщери княжескаго рода, святей преподобней матери нашей Ангелине, праведным житием своим Богу угодившей и ныне во святости Его непрестанно пребывающей, похвальное пение приносим. Ты же, яко имущая велие дерзновение ко Господу, моли усердно Его за нас, поющих ти:
Радуйся, преподобная мати наша Ангелино, святым ангелом равночестная.

Икос 1

Ангелом небесным житием своим уподобилася еси, святая Ангелино, и ныне на небеси со ангелы песнь славословия Пресвятей Троице возносиши. Сего ради и мы, покланяся Творцу своему, приносим тебе славословия сия:
Радуйся, от благочестиваго кореня произрастшая;
Радуйся, на древе рода своего плодоносящею ветвию возросшая.

Радуйся, во благочестии и праведности
воспитанная;
Радуйся, быти дщерию знаменитаго Албанскаго
героя князя Георгия Скандербегу
удостоившаяся.
Радуйся, святость рода своего славнаго
многократно приумножившая;
Радуйся, чести и славы родителей своих пред
людьми не умалившая.
Радуйся, преподобная мати наша Ангелино,
святым ангелом равночестная.

Кондак 2

Видя святой Стефан тебя чистотою небесною
сияющую, возлюби всею душою и, в жены себе
избрав, браком законным сочетсяя. Ты же, на
престол Сербския страны возлюбленным
супругом с почестями возведенная, согласно с
ним воспела Богу: Аллилуиа.

Икос 2

Разумом ко благочестию устремлялася еси,
преподобная Ангелино, уразумевши бо суету
мира сего, избрала еси едино души твоей на
потребу еже благоугождати Богу, темже
претерпела еси изгнание купно с супругом
своим и терпением в перенесении тягот
изгнания душу свою стяжала еси. Таковому
смирению твоему дивляхуся, вопием ти:

Радуйся, многия скорби от врагов страны твоея
претерпевшая;
Радуйся, в скорбех сих яко злато в горниле
очистившаяся.
Радуйся, от тягот изгнания в уныние не
впадшая;
Радуйся, во изгнании крепость духа сохраншая.
Радуйся, семейства своего о Христе
охранительница;
Радуйся, супругу своему верная помощница.
Радуйся, преподобная мати наша Ангелино,
святым ангелом равночестная.

Кондак 3

Сила Вышняго осени тогда к смирению
деспотису премудрую, в мужи Бога бояться
научаючи и чадородием спасатися помогаючи,
всем же сеющим в смирении жати спасение
обещаючи, внегда пети Создателю: Аллилуиа.

Икос 3

Имуще святая Ангелина свыше данную себе
мудрость, яко драгую жемчужину в души своей
Христа сохраняла еси, во всем Ему
благоугождая. Мы же, верою твоею укрепляемии
и материнским попечением твоим окормляемии,
со умилением зовем ти:
Радуйся, материю заботливою народу своему
бывшая;

Радуйся, с подданными своими все невзгоды делившая.

Радуйся, в вере во Христа народ свой просвещавшая;

Радуйся, примером благочестия для всех ставшая.

Радуйся, у народа своего имя «матери Ангелины» заслужившая;

Радуйся, ласково «майкою» си есть «матушкою» от него называемая.

Радуйся, преподобная мати наша Ангелино, святым ангелом равночестная.

Кондак 4

Бурю злых напастей утишая, весь скорбный путь жития своего прошла еси, преподобная мати наша Ангелино, неся свой крест смиренно и терпеливодушно, бысть бо тебе Помощником Сам Господь, Ему же ты взывала: Аллилуиа.

Икос 4

Видяще святое житие твое, блаженная Ангелино, благослови Господь тебя на велий подвиг материнства, ты бо с супругом своим среди испытаний и лишений воспитала еси во благочестии и подвиге сыновей своих: святого архиепископа Максима и святого Иоанна — последнего властителя Сербии. Благослови и нас, духовных чад твоих, во благочестии

всегдашнем пребывати, поющих тебе тако:
Радуйся, мудрость свою любовью во Христе
свидетельствовавшая;
Радуйся, указующая, яко материнство во Дусе
Святе свято есть.
Радуйся, являющая, яко избыток сердца твоего
в чистейших чадах твоих;
Радуйся, ныне с чадами своими во святых
ликующая.
Радуйся, и нас матерним попечением на земли
не оставляющая;
Радуйся, в сердце своем обитель Святей Троице
устроившая.
Радуйся, преподобная мати наша Ангелино,
святым ангелом равночестная.

Кондак 5

Боготечную звезду зрим ты, преподобная наша
мати Ангелино, в Царство Божие нам путь
указующую; светом бо своим неземным
озаряеши души наша, скорбми и печальми
истомленные, обаче Господу зовущия: Аллилуиа.

Икос 5

Видя себя в чистоте, святая Ангелино, по
отшествии ко Господу мужа своего, в ангельский
облик облеклася еси и подвигом монашеским
душу свою благоукрасила еси. Среди чинов
ангельских ныне пребывая, молися за ны, да и

мы в чистоте душевной и телесной пребывать
возможем, поющая тебе сицевая:
Радуйся, ангелом еще на земли уподобившаяся;
Радуйся, царственный путь для себя избравшая.
Радуйся, путем сим неукоснительно шедшая;
Радуйся, в молитве сладостней душу свою
утешавшая.
Радуйся, с Господом непрестанно в молитве
пребывавшая;
Радуйся, подвиг монашеский наравне с
материнским подвигом пронесшая.
Радуйся, преподобная мати наша Ангелино,
святым ангелом равночестная.

Кондак 6

Постом и молитвою плоть твою духови
поработила еси, святая Ангелино, и во славу
Божью пожила еси, сего ради ныне на небеси
Пресвятей Троице поеси: Аллилуиа.

Икос 6

Возсияла еси всему миру благочестием твоим,
святая наша мати Ангелино, радость бо велия
бысть всем земным и небесным, егда Лавру
Крушедольскую построила еси, в ней же ныне
нетленными мощами пребываеши. Мы же, и по
отшествии твоём, яко с нами неотступно
пребывающей, поем ти:
Радуйся, об обителях сербских и русских

заботившаяся;

Радуйся, подвижающимся в обителях сих
благотворившая.

Радуйся, яко с супругом и сынами своими в лике
святых пребываеши;

Радуйся, яко на небосклоне небеснем ныне
сияеши.

Радуйся, и на земли и на небеси венцами
украшенная;

Радуйся, славе земней славу небесную
предпочетшая.

Радуйся, преподобная мати наша Ангелино,
святым ангелом равночестная.

Кондак 7

Хотя народ сербский от турецкаго владычества
избавитися, со слезами к тебе, преподобная
Ангелино, и ко присным твоим пред мощами
вашима взывал есть. Ты же, не оставила еси
народа твоего без защиты, о тебе поющего Богу:
Аллилуиа.

Икос 7

Новаго чуда бысть свидетелие люди
православнии, егда невернии от мощей твоих
исцеления получаху, удивляясь величию веры
христианской. Мы же, ведая силу Божию, на
тебе пребывающую, восхваляем тя, преподобная
наша мати Ангелино:

Радуйся, верою своею во Христа нас
укрепляющая;
Радуйся, в любви Христовой пребывати
непрестанно нас научающая.
Радуйся, яко ты еси утверждение наше во
благочестии;
Радуйся, тебе бо мы молитвы свои возносим, яко
нашей усердной молитвеннице.
Радуйся, яко zde на земли тебе ублажаем и
почитаем;
Радуйся, и на небеси с тобою восхваляти
Господа чаем.
Радуйся, преподобная мати наша Ангелино,
святым ангелом равночестная.

Кондак 8

Странными чудесы прославляясь, преподобная
мати Ангелино, утвердила еси в людех твердую
веру и упование, яко много возможно
праведному по молитве его. Мы же, веруя, яко
аще по Бозе упование на тя возложим, такожде
приимем просимое молением твоим, поем о тебе
Создателю: Аллилуиа.

Икос 8

Всю себя предав воли Божией, неутомимое
попечение о спасении души своея и чад твоих
имела еси, тии же, воспитанныи материнскими
стараниями твоими во благочестии и

послушании, достойными продолжателями рода твоего славного быша. Ведая святыя труды и подвиги чад твоих во благо святыя Церкви и страны своея, восхваляем твою материнскую любовь и мудрость:

Радуйся, Архиерею Небесному на служение святого архиепископа Максима возрастившая;

Радуйся, на труды святительския того благословившая.

Радуйся, и другим сыном твоим, святым Иоанном, в материнском звании возвеличенная; Радуйся, яко благочестием чад твоих главу свою увенчавшая.

Радуйся, яко сил твоих на воспитание чад своих не жалевшая;

Радуйся, сыновнею любовью за любовь свою материнскую щедро вознагражденная.

Радуйся, преподобная мати наша Ангелино, святым ангелом равночестная.

Кондак 9

Всякия скорби, болезни, искушения от нечестивых во изгнании с супругом и чадами своими претерпела еси, преподобная мати Ангелино. И вси сии, бываемыя тебе, с Божиею помощию, преодолела еси. Сего ради, научаяся подвигам твоим, вопием о тебе Богу: Аллилуиа.

Икос 9

Витийство человеческое не возможет по
достоянию восхвалити подвиги твоя и
промышление о тебе Божие, преподобная мати
Ангелино, яко не толико невестою владыки
земнаго сподобилася еси быти, обаче невестою
Христовою нареклася еси. Мы же, вся сия
ведуще, радуящеся глаголем тебе:

Радуйся, на заре жития своего в мантию
деспотисы облаченная;

Радуйся, на закате жития своего сию на мантию
монахини сменившая.

Радуйся, венцем от владыки земнаго
коронованная;

Радуйся, венцем от Господа на небеси
увенчанная.

Радуйся, одежды королевския на иноческия
сменившая;

Радуйся, в наряде ангельском пред Господом
представшая.

Радуйся, преподобная мати наша Ангелино,
святым ангелом равночестная.

Кондак 10

Спасти хотя душу твою, богомудрая наша мати
Ангелино, в кротости и смирении Христови
уподобитися возжелала еси и в сем дивно
преуспела еси. Тем же и нам, хотящим спасение

стяжати, не преставай помогати, вопиющим Богу: Аллилуиа.

Икос 10

Стена еси и заступление всем с верою и любовью к тебе притекающим, святая Ангелино, тем же молим тя: заступи и огради нас от искушений, бед и озлоблений, с любовью взывающих тебе:

Радуйся, яко в тебе зрим материнское к нам благоволение;

Радуйся, яко твоими молитвами скорби наша утишаются.

Радуйся, добре подвизающихся непрестанно укрепляющая;

Радуйся, на благое и душеполезное нас наставляющая.

Радуйся, от домашния вражды единокровныя миром ограждающая;

Радуйся, любить ближних своих нас научающая.

Радуйся, преподобная мати наша Ангелино, святым ангелом равночестная.

Кондак 11

Пение благодарственное Господеви нашему приносим, яко даровал нам в тебе, преподобная наша мати Ангелино, теплую молитвенницу, скорую помощницу и дивную заступницу, воспевающе Ему: Аллилуиа.

Икос 11

Светом Божественным осиянная, преподобная Ангелино, ныне во блаженстве со Господом пребываеши и у Престола Его дерзновенно за всех православных молиши. Яко мати архиерея сущая, буди духовной материю и всем архиереям ныне святительский подвиг несущим, да благословляют тебя тако:

Радуйся, верная раба Божия, паче всех благ Господа возлюбившая;

Радуйся, душу свою елеем добрых дел умастившая.

Радуйся, Жениху Небесному в полунощи во сретение изшедшая;

Радуйся, светильник свой до последнего часа своего не угасившая.

Радуйся, ангелами на небеса вознесенная;

Радуйся, в райския двери небоязненно вшедшая.

Радуйся, преподобная мати наша Ангелино, святым ангелом равночестная.

Кондак 12

Благодать Божию щедро изливавшуюся на тебе, святая Ангелино, испроси и нам от Всещедрого Бога и Спаса нашего, да нею вразумляемии и укрепляемии ходим во свете заповедей Божьих и достигнем вечного блаженства, воспевающе Богу: Аллилуиа.

Икос 12

Поюще Бога, дивнаго во святых Своих, хвалим
тя, Христову исповедницу, за долготерпение и
преславная благодеяния твоя, ублажаем
праведную кончину твою, почитаем и
священную память твою и в похвалу сицевая
тебе зовем:

Радуйся, за всех тезоименитых Ангелин пред
Богом сугубая и теплая молитвенница;

Радуйся, и нас, чад твоих, в своих молитвах
поминающая.

Радуйся, любовью материнскою щедро всех
возлюбившая;

Радуйся, всех, к тебе прибегающих, милостию
своею покрывающая.

Радуйся, утешением и радостью молящихся
пред честными мощами твоими возвеселяющая;

Радуйся, иконами своими милосердное
заступление нам являющая.

Радуйся, преподобная мати наша Ангелино,
святым ангелом равночестная.

Кондак 13

О, святая преподобная наша мати Ангелино,
святым ангелом житием своим поревновавшая!

Молим тя усердно: не оставляй нас во дни
скорби и напасти и избавление от сих нам
даруй, да спасаемии и укрепляемии
заступлением твоим возвеселимся душами

нашими и воспоем Творцу и Богу: Аллилуиа.
Этот Кондак читается трижды, затем Икос 1-й и
Кондак 1-й

Молитва

О, великая угодница Христова и преславная
мати наша Ангелино! Ты на Небеси душею
своею у Престола Божия предстоиши и
славословие Ему непрестанно возносиши,
обрати взор свой на нас сырых и скорбящих и
помолися за нас ко Господу, да наставит нас на
путь истины и благочестия, коим возможем и
мы по скончании жития нашего в Отечество
наше небесное взойти и с тобою Богу
поклониться. Ей, преподобная наша мати,
зриши с Небеси, яко время тяжкое безбожное
наста и души наша скорбию исполнишася.
Несть спасающаго, несть помогающаго, токмо
Бог Единый, на Него же уповаем и Ему же славу
возсылаем со Отцем и Сыном и Святым Духом
ныне и присно и во веки веков. Аминь.

